



Broj: 01,02,03,03/11-05-1-2572-2/16  
Sarajevo, 22.12.2016.

## **Izveštaj sa sastanka Stalnog odbora Parlamentarne skupštine Procesa saradnje u Jugoistočnoj Evropi (PSSEECР) Zagreb, 3. decembar 2016.**

Članovi Delegacije Parlamentarne skupštine BiH u Parlamentarnoj skupštini Procesa saradnje u Jugoistočnoj Evropi (PSSEECР) Bariša Čolak, Momčilo Novaković i Hanka Vajzović prisustvovali su Ministarskoj konferenciji zemalja Jugoistočne Evrope održane 2.12.2016. i učestvovali u radu Stalnog odbora PSSEECР-a, održanog 3.12.2016. u Zagrebu. Hrvatski sabor preuzeo je jednogodišnje predsjedavanje ovom inicijativom od Narodne skupštine Republike Bugarske 1.7.2016.

Na sastanku Stalnog odbora učestvovali su članovi Stalnog odbora iz Atine, Beograda, Ljubljane, Prištine, Sarajeva, Tirane i Zagreba. Delegacije Podgorice, Skoplja i Sofije predstavljali su nacionalni koordinatori, a Ankaru otpravnica poslova ambasade u Zagrebu. Kišinjev i Bukurešt nisu imali predstavnike na sastanku Stalnog odbora.

Sastanak je otvorio potpredsjednik Hrvatskog sabora Gordan Jandroković koji je u ime predsjednika Sabora i predsjednika Parlamentarne skupštine SEECР-a Bože Petrova pozdravio sve prisutne i podsjetio na prioritete hrvatskog predsjedavanja Parlamentarnom skupštinom koje je uputio bivši predsjednik Sabora Željko Reiner.

Moderiranje sastankom preuzela je Majda Burić, zamjenica člana delegacije Hrvatskog sabora u PSSEECР-a, i predložila prijedlog dnevnog reda koji je usvojen.

U okviru druge tačke dnevnog reda, koja se odnosila na razmjenu mišljenja s generalnim sekretarom RCC-a, generalni sekretar RCC-a Goran Svilanović predstavio je prisutnima "Strategiju jugoistočne Evrope 2020" koja se zasniva na strategiji „Evropa 2020“, ali se odnosi na teritoriju jugoistoka Evrope. Napomenuo je da je Strategija rezultat rada ministara privrede koji su od 2010. do 2013. godine definirali 11 ciljeva privrednog rasta među kojima je istakao: rast BDP-a, povećanje stope zapošljavanja, rast trgovine u okviru jugoistočne Evrope te trgovine JIE sa ostatkom svijeta, unapređenje investicija u obrazovanje te povećanje broja visokoobrazovanih mladih ljudi.

Svilanović je učesnicima sastanka rekao kako se od 1.1.2017. Strategija JIE 2020 oslanja na tri vodeće inicijative:

1. Vještine i mobilnost – ovom inicijativom počinje proces pregovora kretanjem ljudi s određenim profesionalnim znanjem u okviru regije (prije svega stomatolozi, ljekari, arhitekti, građevinski inženjeri). Također, cilj je postići potpuno automatsko priznavanje diploma mladih ljudi u regiji, koje počiva na bolonjskom procesu.
2. Konkurentnost – ovom inicijativom RCC želi postići regionalni investicijski sporazum putem kojeg bi investitori imali slične uslove poslovanja na prostoru čitavog zapadnog Balkana.
3. Povezanost – U okviru „mekih mjera povezanosti“ RCC želi napraviti tzv. ekonomske koridore, tj. podići privredni razvoj JIE uz novu saobraćajnu infrastrukturu. Ovom inicijativom bio bi stvoren jedinstven informacijski prostor, što uključuje i bolje uslove rominga i širokopojasnog interneta u regiji.

Tokom sastanka prisutnima se obratila potpredsjednica Parlamenta Beograd Gordana Čomić koja je naglasila da se zalaže za regiju i regionalne sporazume zbog kojih će JIE prosperirati a poslanica iz Parlamenta Atena Evangelija Vagionaki pozdravila je inicijative kojima je cilj smanjenje nezaposlenosti, koju smatra najvećim problemom regije.

Poslanica iz Parlamenta Sarajevo Hanka Vajzović pozdravila je sve najavljene inicijative RCC-a i predložila da svaka zemlja prvo poradi na svom zakonodavstvu o spomenutim inicijativama, pa da se nakon toga krene u aktivnosti na nivou regije. Spomenula je kako su u BiH veliki problemi nezaposlenost, ujednačavanje diploma, ali i investicije stranih ulagača, posebno onih iz arapskih zemalja.

U završnom obraćanju Svilanović je rekao da postoji mogućnost organizacije okruglog stola o integracijama u EU na kojem bi volio da učestvuju predstavnici PSSEEC-a.

U okviru treće tačke dnevnog reda govorilo se o daljnjem radu glavnih odbora i imenovanju izvjestilaca. Predsjedavajuća sastankom poslanica Majda Burić podsjetila je prisutne da je na prošlom plenarnom zasjedanju koje je održano u Sofiji u junu ove godine usvojen Program rada Parlamentarne skupštine za period hrvatskog predsjedavanja 2016. - 2017. U aneksu Programa naznačeno je da se Parlament Priština kandidirao za predsjedavanje Glavnim odborom za privredu, infrastrukturu i energiju, a Parlament Beograd ponudio je predsjedavanje Glavnim odborom za pravosuđe, unutrašnje poslove i sigurnosnu saradnju. S obzirom na to da nije postignut konsenzus o predsjedavanjem Prištine, odnosno Beograda navedenim odborima, Parlament Zagreb, u funkciji predsjedavajućeg, ponudio je kompromisno rješenje prema kojem bi Zagreb predsjedavao i bio domaćin oba odbora.

Poslanica iz Parlamenta Priština Blerta Deliu Kodra potvrdila je da Priština pristaje na prijedlog Zagreba i da će poslanik Muhamet Mustafa biti izvjestilac iz Prištine. Gordana Čomić se također saglasila s prijedlogom Zagreba te izvijestila da će poslanik Darko Luketić biti izvjestilac Glavnog odbora za pravosuđe, unutrašnje poslove i sigurnosnu saradnju.

Četvrta tačka dnevnog reda bila je posvećena razmjeni mišljenja o pitanju stalnog sekretarijata. Predsjedavajuća sastankom poslanica Majda Burić podsjetila je na ponude Ankare i Sofije.

Zastupnik iz Parlamenta Ljubljana, Branko Zorman napomenuo je da Ljubljana već dvije godine upozorava kako je pitanje stalnog sekretarijata vezano za budućnost Parlamentarne skupštine. Predložio je da predsjedavajući Zagreb pozove Sofiju i Ankaru da pisanim putem aktueliziraju te dvije ponude. Napomenuo je ukoliko one više nisu aktuelne da će se morati naći neko treće rješenje. Također je podsjetio na to da je, kada se u Tirani glasalo o podršci Sofiji, odnosno Ankari, osam članica PS-a, među kojima i Ljubljana, podržalo Ankaru, a tri Sofiju.

Poslanica Evangelia Vagionaki ponovila je stav Atene da stalni sekretarijat treba biti u Sofiji jer je bitno da sekretarijat bude smješten na prostoru Evropske unije, a sve zemlje SEECP-a imaju cilj da postanu članice EU-a. Što se tiče budžeta, Atena će zbog teške ekonomske situacije podržati manji budžet – onaj Sofije, a s vremenom, ako ekonomska situacija to dopusti, postoji opcija za raspravu o mogućem povećanju budžeta. Napomenula je kako ovo pitanje nije isključivo ekonomsko, nego i političko, te da ne može biti riješeno glasanjem, već isključivo konsenzusom. Predložila je da se problem pokuša riješiti na nivou predsjednika parlamenata.

Opravna poslova Babadogan Ertan odgovorila je kako će konsultirati Parlament Ankaru, koji će dostaviti pisanim putem svoj prijedlog izrazivši nadu da će se pitanje stalnog sekretarijata riješiti u toku hrvatskog predsjedavanja.

Poslanik iz Parlamenta Sarajevo Momčilo Novaković podržao je prijedlog da se pisanim putem prikupe kandidature Sofije i Ankare, te predložio da se komunikacija o problem sekretarijata podigne na nivo predsjednika parlamenata.

U okviru tačke razno predsjedavajuća sastankom poslanica Majda Burić izvijestila je prisutne da je delegacija Parlamentarne skupštine SEECP-a učestvovala, u statusu posmatrača, na plenarnom zasjedanju Baltičke skupštine i Baltičkog vijeća koje je održano 27. i 28. 10. 2016. u Latviji te na zasjedanju Parlamentarne skupštine Organizacije za crnomorsku ekonomsku saradnju (PABSEC) održanom u Beogradu, 1.12.2016. Svim članovima Stalnog odbora bit će upućen pisani izvještaj s oba zasjedanja. Također, Majda Burić izvijestila je članove Stalnog odbora da je predsjednik Parlamentarne skupštine SEECP-a Božo Petrov uputio pismo Elmaru Broku, predsjedniku Odbora za vanjske poslove Evropskog parlamenta (AFET), nadovezujući se na komunikaciju između bugarskog predsjedavanja Parlamentarnom skupštinom i AFET-a. O sadržaju pisma, kao i o povratnoj informaciji iz EP-a kada stigne, članovi Stalnog odbora bit će obaviješteni.

### **Zaključci sa sastanka Stalnog odbora održanog 3.12.2016.:**

- Parlament Zagreb zaprimat će pisane kandidature za sjedište stalnog sekretarijata do zaključno 31.1.2016.;
- Sastanak Glavnog odbora za privredu, infrastrukturu i energiju održat će se u Zagrebu, pod predsjedavanjem Parlamenta Zagreb, sa izvjestiocem iz Prištine prof. Muhametom Mustafom o temi: "Smanjenje ovisnosti o nabavci energije u JIE“;
- Sastanak Glavnog odbora za pravosuđe, unutrašnje poslove i sigurnosnu saradnju održat će se u Zagrebu, pod predsjedavanjem Parlamenta Zagreb, sa izvjestiocem iz

Beograda Darkom Luketićem o temi: „Sigurnosni izazovi u JIE – regionalni odgovor“;

- Sastanak Glavnog odbora za socijalni razvoj, obrazovanje, istraživanje i nauku bit će održan u Istanbulu, pod predsjedavanjem Parlamenta Ankara; izvjestilac Hakan Çavuşoglu; tema: „Razmjena univerzitetskog nastavnog plana i programa za profesionalni prosperitet mladih u Jugoistočnoj Evropi“;
- svi sastanci glavnih odbora predviđeni su za mart sljedeće godine, a o konkretnim datumima će se izvijestiti naknadno;
- Parlamentima će biti upućena pisani izvještaji o učešću delegacije PSSEECp-a na zasjedanjima Baltičke skupštine i PABSEC-a;
- Parlamentima će biti prosljeđena komunikacija predsjednika Bože Petrova i predsjedniku AFET-a Elmara Broka;
- Parlament Zagreb nastaviti će komunikaciju s RCC-om u vezi sa sastankom o transevropskoj politici koji će biti održan u Prištini 3.3.2017., a u sklopu kojeg postoji mogućnost organizacije okruglog stola o integracijama u EU na kojem bi učestvovali predstavnici PSSEECp-a.

Izvještaj pripremila:  
nacionalna koordinatorica  
Jadranka Radović

Izvještaj odobrio:  
šef Delegacije PSBiH u PSSEECp  
Bariša Čolak

Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za odnose s javnošću
- a/a